

समे – 12:25 hrs.

<><><><><><>

ISRO

भारतीय अंतरिक्ष अनुसंधान संगठन- इसरो नै अज्ज आंध्र प्रदेश दे श्रीहरिकोटा थमां दूई पीढ़ी दे नेविगेशन सेटैलाइट एन.वी.एस.-02 दा सफल प्रक्षेपण कीता। इसी बडलै 6 बज्जिए 23 मिनट पर जी.एस.एल.वी.-एफ-15 प्रक्षेपण यान दी मदद कन्नै छोड़ेआ गेआ। सतीश धवन अंतरिक्ष केन्द्र सोयां एह इसरो दा 100मां ऐतिहासिक प्रक्षेपण ऐ। एनवीएस-02 उपग्रह, भारतीय नक्षत्र प्रणाली कन्नै दूई पीढ़ी दे नेविगेशन दा हिस्सा ऐ, जेडी भारत दी स्वतंत्र क्षेत्रीय नेविगेशन उपग्रह प्रणाली ऐ, जिसी भारत च इस्तेमाल करने दे कन्नो-कन्नी भारतीय भूभाग थमां लगभग डे० हजार किलोमीटर अगगे तकर फैले दे क्षेत्र दी सटीक स्थिति, वेग ते समय सेवा प्रदान करने आस्तै डिज़ाइन कीता गया ऐ। साइंस, टेकनालजी ते अंतरिक्ष विभाग दे मंत्री डॉ. जतिंद्र सिंह होरें इस मौके पर इसरो गी ममारकबाद दिती ऐ।

<><><><><><>

2nd Amrit Snan

प्रयागराज च अज्ज मौनी मस्सेया दे मौके पर महाकुम्भ 2025 दा दूआ अमृत स्नान एल्लै चलै करदा ऐ। ते एल्ले कोई 8 कोला 10 करोड़ श्रद्धालु संगम दे बक्ख-बक्ख घाटें पर मजूद न। सोशल मीडिया ते किश टी.वी चैनलें पर प्रयागराज च नस्स-भज्ज दिएं खबरें दे चलदे

उत्तर प्रदेश दे मुखमंत्री योगी आदित्यनाथ होरें आखेआ ऐ जे प्रशासन हालात पर नेड़मी तक्क रक्खा'रदा ऐ ते प्रधानमंत्री नरेंद्र मोदी ते गृह मंत्री अमित शाह होरें बी इस बारे फोन करियें स्थिति बारे पुच्छेआ ऐ। प्रधानमंत्री नरेंद्र मोदी होरें हुनै कोला किश चिर पैहले इक सोशल मीडिया पोस्ट च प्रयागराज च होए दे हादसे दे मारे गेदे लोकें दे परिवार आहलें कन्नै हमदर्दी प्रकट कीती ऐ ते घायलें दे तौलें नरोए होने दी कामना कीती ऐ। योगी आदित्यनाथ होरें लोकें अग्गे अपील कीती ऐ जे ओह् अफवाई पर यकीन नेई करन। हिंदु मान्यताएं मूजब मौनी मस्या गी इक पवित्र मौका मन्नेआ जंदा ऐ ते इस मौके स्नान करने दा बी म्हातम होंदा ऐ ते महाकुम्भ दे दौरान इस मौके दा म्हातम होर बी बधी जंदा ऐ। महाकुम्भ दुनिया दा सब्बनें शा बड्डा धार्मिक किट्ठ ऐ जेदे च करोड़ें दी गिनतरी च श्रद्धालु देश ते दुनिया दे बक्ख-बक्ख हिस्सें थमां संगम च पवित्तर चलोबी लाने लेई आवा करदे न।

<><><><><><>

LG-Budget

जम्मू-कश्मीर विधानमंडल दी सलाहकार कमेटी दी बैठक मेद ऐ जे फरवरी म्हीने दे पैहले हफते च लग्गी सकदी ऐ जेदे च विधानसभा दे औंदे बजट इजलास दे कार्यक्रम गी मुकदा रूप दित्ता जाग। उपराज्यपाल मनोज सिन्हा होरें 20 जनवरी गी लग्गी दी बैठक च बजट इजलास दस्सने दा प्रस्ताव रक्खेआ गया हा जिसी एल.जी हुंदी मंजूरी थहोई गेदी ऐ। बजट इजलास 3 मार्च गी शुरू करने दा कार्यक्रम ऐ। मुखमंत्री उमर अब्दुल्ला जिंदे कशा खजाना मैहकमे दी बी जिम्मेवारी ऐ, ओह् 2024-25 बरे लेई जम्मू-कश्मीर दा बजट पेश करडन।

<><><><><><>

Rana-Jual Meet

जम्मू-कश्मीर च जनजातीय समुदायें दे जीवन स्तरै गी उबड़ा चुक्कने बक्खी कोश्टें दे तैहत इक होर महत्वपूर्ण गैह् पुट्टदे होई जनजातीय मामलें दे मंत्री जावेद राणा होर कल नमीं दिल्ली च केंद्री मंत्री जुअल ओराम हुंदे'नै मिले ते इनें समुदायें दे पूरे-पराते विकास बारे इक व्यापक योजना दी रूप रेखा बारै उन्दे कन्नै चर्चा कीती। गल्लबात दौरान इनें समुदायें गी दरपेश चुनौतिएं कन्नै निब्बड़ने, उन्दी शिक्षा दे स्तर गी बड़ा चुक्कने ते सेहत सेवां उपलब्ध कराने बारै वयपक चर्चा कीती। इस योजना च प्रस्तावित मुख सुझाएं च राजौरी-पुंछ जिले च 15 एकलव्य आदर्श रिहायशी स्कूल खोलने, 50 टेलीमेडिसिन केंद्र, 1 जनजातीय स्मार्ट ग्रां तैयार करने ते कुदरत दे अनुकूल सैलसफा प्रोजेक्ट शुरू करने दे प्रस्ताव शामिल न। जनजातीय समुदायें दिएं महिलाएं दे सशक्तिकरण बारे केंद्री मंत्री होरें जावेद राणा होरें गी उंदिएं सुधारात्मक पैहलकदमिं च केंद्र दी तरफा हर चाल्ली दे सहयोग दा यकीन दोआया गेआ।

<><><><><><>

Search-Sports

जम्मू-कश्मीर पुलस, फौज ते नीम फौजी बलें जम्मू प्रांतै दे कोई 2 दर्जन इलाकें च आतंकवाद रोधी अभियानें च तेजी आंदी ऐ। आकाशवाणी दे जम्मू संवाददाता नै जानकारी दिती ऐ जे एह अभियान 2024 च होए दे आतंकी हमले दे सिलसिले च चलाए जा करदे न जिंदे च 18

सुरक्षा कर्मिणं ते 14 आम नागरिके सने 44 लोके दी जान गई ऐ। इस अभियान दा मकसद चिनाब घाटी दे पहाड़ी इलाके च आतंकी ठकाने गी तबाह करना ऐ।

<><><><><><>

Army-Monolith

1971 च पाकिस्तान कन्ने होई दी जंग च भारत दी शानदार जित ते इस जित च चिनाव ब्रिगेड दी महत्वपूर्ण भूमिका गी चेता करदे होई सहाड़े सैनिके दी दलेरी ते बलिदान दे सम्मान च कल जम्मू जिले दे परगवाल इलाके च इक 'एकाश्म शिला' स्थापित कीती गई।z एह शिला जंग दौरान फुलकियां दी लड़ाई च सैनिके दी दलेरी दी यादगारी च टाइगर डिविजन तैहत चिनाब ब्रिगेड आसेआ लाई गेदी इस शिला दी स्थापना मौके वरिष्ठ सैनिक, बीएसएफ ते जम्मू-कश्मीर पुलस दे अलावा कई मकामी नागरिक बी मजूद हे। एह शिला फौज दी बहादुरी ते बलिदान गी सदा चेता रखने, नौजवाने गी प्रेरित करने ते सेना ते सिविल जनता बश्कार सहयोग ते तालमेल बधाने च मती महत्वपूर्ण साबत होग।

<><><><><><>

Weather

जम्मू-कश्मीर च अज्जै थमां बक्ख-बक्ख थाहें उप्पर बरखा ते बर्फबारी दी मेद ऐ। मौसम विभाग नै अज्ज रातीं ते कल बड्डलै बी केई सारी थाहें उप्पर हौली बरखा बरने ते बर्फबारी दे असार जताए न। एहदे परैन्त औंदी पहली फरवरी दी रातीं ते 2 तरीक गी बी दरम्याने ते उच्चे पहाड़ी इलाके च दरम्याने दर्जे दी बर्फबारी दी पेशगोई कीती गई ऐ। तोआई जम्मू-श्रीनगर राश्ट्री जरनैली सिडक एनएच-44 पर गड्डिणं दी आओजाई दौने बक्खी दा बवस्थित

पंगमै'ने होआ करदी ऐ। ऊआं लोकेँ गी एह सलाह बी दिती गेदी ऐ जे ओह अपनी लेन च पूरे अनुशासन कन्ने गड्डी चलान ते दिनेँ बेल्लै सफर गी मती तरजीह देन। तोआई जम्मू खिते दे रजौरी ते पुंछ जिलेँ गी कश्मीर घाटी दे शोपियां जिले कन्ने जोड़ने आहली ऐतिहासिक मुगल रोड अजेँ बी गड्डीएं दी आओजाई लेई बंद ऐ।

<><><><><><>